


公南府君行述

錢其琛學長遺容



府君諱其琛字公南，世籍江蘇南通，生於民國紀元前十二年。既入塾之歲，先大父實秋公親授經史，日課綦嚴。民國初元，始入學校就讀，成績優異，時國勢積弱，內患軍閥割據，外苦強鄰窺伺，民陷流離，迄鮮寧歲。府君年未及冠，憂心世事，恍然思以實用之學，以自效於家國，會五四運動起，府君甫畢中學學業，以爲立身報國，必須振興實業，庶爲富國強民之基，遂考入上海國立交通大學，專習電機，昕夕鑽研，雖兵戈時警，而肄習未嘗稍輟，既以優列完成學程，即奉分發入交通部電政司任職，時北府

政局擾攘，未久卽南旋，改入財政部鹽務方面工作，蓋叔水之奉，捧檄事親，非夙志也。北伐告成，南都定鼎，庶政維新，建設伊始，府君遂得以其所學之專長再爲交通部所禮羅，復入電政司任事，時民國十八年，此後府君遂終生從事交通事業，其欲以實用之學報效家國之願，至是始得稍稍遂償。

民國二十一年，府君調任電政司第四科科长，主管電政監理。我國電信事業，自民元以來，地方軍政機關尙多因襲舊貫，干預督轄，其由中央劃一監督，以爲逐漸統一經營之各項法令規程，多出府君之手，北伐完成之際，政府所辦長途話線，祇有四千餘對公里，各省亦間有自設長途話線，爲數不多，且多係單程鐵線，傳音不能清晰。至是首建京滬新線，繼展至浙江，而浙省長途電話網首以築成。蘇、魯、湘、皖方圖繼起，府君慮其各自爲計，規格規模，紛歧難爲一貫，府君交大同學尹仲容先生方長電政司業務科，日

與府君計議所見僉同，以爲電信交通爲國家統一政令傳遞之基礎，必有全局久遠之規劃，逐步推行，先宜從腹地九省長途電話網之完成着手，九省者，蘇、皖、湘、鄂、粵、魯、晉、冀、豫是也。顧願宏費鉅，而材料規範，必有準繩，於料款則多方周折，終經由借用庚款以爲挹注，其材料之購辦，則先成立電信材料程式委員會，手訂程式六十四種，原則既邀核定，乃於二十四年首途赴英，與標準電話電纜公司洽購，並監造九省長途電話網所用增音器及長途臺各項設備，濡滯十閱月，並於公餘考察英國郵電業務，返國旅途，復便道赴德美兩國考察，就夙學而益以見聞，歸草考察報告，以此深爲其時主政所倚畀，遂奉命調技術廳技正兼組長，因倡建立材料試驗室，爲國內電信材料試驗最新穎完備而首創者。同時復兼材料供應委員會組長，迄抗戰前夕，政府所置長途雙銅話線計五千二百餘對公里，數年間，增加十二倍有餘，而質優更勝於前，其後此批機料之儲件，運抵陪都，於抗戰期間，後方各戰區軍民通信，裨益至鉅。

戰時，府君調任電政司幫辦，復奉中央令兼中央文化驛站總管理處長，因於鄰近陷區及敵後建立分站，一方溝通運輸，一方傳播政令，使陷區民衆與後方情形不致隔膜，其收穫雖在無形，而運輸預算，大形節省，在民國二十八年幣值尙未大呈波動之時，年省五十餘萬，以此上荷中央嘉許。民國三十二年，電信總局成立，電政司改稱郵電司，府君以郵電司幫辦兼任電信總局副局長，規劃復員電信大計，曾奉頒五等景星勳章，勝利還都，復奉頒勝利勳章。

民國三十五年，府君當選爲國民大會代表，並兼任電信總局局長，抗戰之役甫終，戡亂之役繼起，匪共禍國，電信破壞，舉國騷然，其間舊有電信事業之維護與新建線路之擴展，昕夕不遑，辛勞備至，其施爲於當時戰局，攸關至鉅，復於三十八年，奉頒四等景星勳章，迄大陸淪陷，中間安輯流亡，遷運器材，類皆事先密加佈置，臨事庶免差池，中間復以出席電信國際會議赴墨西哥，行則披星戴月，居則心運手揮，府君心力之耗損，半盡於此數年中矣。

民國三十九年，府君奉令任交通部常務次長仍兼電信總局事，嗣後十年中，於交通庶政之推進，交通四年分期建設計劃之擬訂，皆躬預其役，既參與計劃之核定，復躬主計劃之進程，於安定中求進步，蓋爲赴

事所自懸之鵠的。民國四十九年，府君復當選為電信黨部主任委員，當以事繁請辭部職，因奉令調任交通部技監仍兼總電信事。民國五十四年，以配合輔導退役官兵就業政策有功，奉頒海陸空軍褒狀，同年，中國電機工程學會復以其對我國電信事業發展之貢獻，頒給電機工程獎章，民國五十五年，政府以其參加盤石專案工作著有成績，頒給千城甲種二等獎章。民國五十七年，引年請退，政府念其從事交通建設事業數十年，業績昭然，聘為行政院顧問，中國國民黨亦推任為中央評議委員。政府遷臺以來，電信事業之發展，類皆世所共見，然其主張成立電子研究及訓練中心計劃，以至申請聯合國特別基金，由交通大學電子研究所執行，得由國內製造電晶體、微波發射電工管及電掣等，實為我國電子工業開其先河，由此累積，以至衛星通信地面電臺之建立，使我國電信事業與并世各先進國家肩並而無遜色者，固非一手一足、一朝一夕所可倖致，然倡導學劃，實亦由於府君生平念茲在茲以實用之學報國之信念所使然，此一信念，老而彌篤，概可見矣。

府君性素嚴謹，不苟言笑，外觀若厲，即之也溫，起居有序，在公職四十餘年如一日，自奉儉約，度俸入以贍家計，不蓄餘財。不孝兄弟男女各二人，長男愉祖，交通大學畢業，陷大陸。次女慰祖，適邢君慕寰，現為中央研究院院士暨大學教授。三女懌祖，適吳君振家，現為台元紗廠協理。四男志祖臺灣大學畢業，曾赴美國深造。

府君體素健，鮮疾病，夙有失眠疾，稍加休息輒愈，初亦未加措意，年前忽患健忘，醫言，腦力損耗過鉅，宜靜攝，非藥石所可立效。志祖聞訊過歸，期能長依膝下，侍承色笑，稍伸反哺之私，而府君病情亦稍稍就痊，時或清健如常，私心竊慰，詎於九月廿八日午餐間，精神忽現不振，及掖侍就榻小憩，並延醫診視，方知府君竟已棄不孝等而長去矣。嗚呼慟哉。不孝行能無似，苦塊昏迷，慈幃在堂，不敢不勉旃以承大事，繼志是所私期，述先慮遺其大，謹就所知略陳梗概。

伏維

棘人 錢 愉 祖 謹述

嚴副總統軼頌『鴻案垂型』

莫母王夫人行狀



夫人吳興王氏，楚卿先生長女，秉性純淑，孝友天成，幼習詩禮，能文字，有才思。晚清末季，風氣漸開，蘇滬競設女學，夫人遂隨家居滬，肄業務本女子師範學校，淵源家學，業冠儕輩，才名藉甚，鄉里世族，爭相聞名，太翁莫葵卿先生時肄業上海南洋公學（交通大學前身）莫王世代交親，慕夫人才華，遂納聘焉。莫公英年早達，既畢業，北上供職交通部，民國十年王夫人來歸，珠聯璧合，親族交羨。莫公旋就上海市工務局事，夫人相與南歸，定居滬濱，相莊賓教，倡隨彌樂。

民國廿六年，抗戰軍興，政府設陪都於重慶，莫公參加運輸工作，由滬轉赴滇黔，統籌川桂黔公路運輸，創設資源委員會運務處，時莫太夫人年事已高，體弱不勝行旅，夫人隨侍，仍留滬寓，上奉威姑，俯蓄子女，直至三十四年抗戰勝利，莫公凱旋至滬，始獲重聚。不意太夫人竟於是時棄養，莫公于役公路運輸八年，無後顧之憂者，皆賴夫人辛苦支撐，賢聲遠播，良非偶然。

三十五年 莫公任交通部主任秘書，三十六年改任隴海鐵路局長，共匪作亂，鐵路時遭破壞，莫公坐鎮西安，辛勞備至，夫人勤儉持家，教育子女，學業各有成就。